

'Tiada bukti jelas Omicron tingkatkan imuniti' - Khairy

Oleh Ruwaida Md Zain - Januari 16, 2022 @ 3:00pm
bhnews@bh.com.my



Khairy melawat gerai pameran Majlis AIDS Malaysia pada majlis pelancaran MENGAKHIRI AIDS melalui kerjasama pintar 'Go-Ngo' model KK 2.0 peringkat kebangsaan di pekarangan Klinik Kesihatan Pandamaran. - NSTP/Saifullizan Tamadi

KLANG: Tiada bukti jelas menunjukkan pendekatan kesihatan awam di dunia, menyatakan seseorang itu perlu dijangkiti COVID-19 varian Omicron untuk membina imuniti kepada wabak berkenaan.

Justeru, Menteri Kesihatan, Khairy Jamaluddin mengingatkan, masyarakat agar tidak mendedahkan diri dengan COVID-19 varian Omicron, walaupun kesan jangkitan lebih sederhana berbanding Delta.

"Tidak kira varian apa...Omicron ke, Delta, Alpha dan Beta, jangan sengaja nak dapatkan COVID-19, sebab yang pertama kita tidak tahu kesan wabak itu sama ada mereka sudah divaksin atau tidak.

"Kita tidak tahu kesan jangka panjang COVID-19 kepada mereka yang pernah dijangkiti. Hari ini mungkin kita kata Omicron ini lebih 'mild' daripada Delta jadi 'why not semua' dijangkiti dengan Omicron. Kita dapat imuniti kelompok dan sebagainya.

"Itu tidak terbukti lagi. Kita tahu Omicron 'milder' tetapi tidak bermakna kita perlu dijangkitinya (but it doesn't mean we should get it).

"(Pendekatan) tidak terbukti lagi (kesahihannya)..tetapi nasihat KKM, masyarakat tetap perlu mendapatkan dos penggalak," katanya.

Beliau berkata demikian dalam sidang media ketika diminta mengulas laporan berita yang mendakwa varian Omicron mampu meningkatkan imuniti kelompok dalam masyarakat disebabkan keadaan transmisinya yang tinggi oleh pakar virologi dari Afrika Selatan.

Terdahulu, beliau merasmikan Majlis Pelancaran Inisiatif Mengakhiri AIDS Melalui Kerjasama Pintar GO-NGO Model KK 2.0 Peringkat Kebangsaan di Klinik Kesihatan Pandamaran, di sini hari ini.

Yang turut hadir, Ketua Setiausaha KKM, Datuk Seri Mohd Shafiq Abdullah dan Pengarah Kesihatan Negeri Selangor, Datuk Dr Sha'ari Ngadiman.

Dalam pada itu Khairy berkata, 99 peratus daripada mereka yang dijangkiti Omicron di negara ini adalah pada Kategori 1 dan 2.

Ketika ditanya mengenai statistik harian jangkitan COVID-19 yang semakin meningkat, beliau meminta agar semua pihak tidak dinilai kadar peningkatan berdasarkan statistik harian semata-mata.

"Selama beberapa minggu ini, pergerakan (masyarakat) meningkat disebabkan cuti persekolahan juga perayaan seperti Krismas, sambutan tahun baru, Thaipussam kemudian Tahun Baru Cina (tidak lama lagi).

"KKM menjangkakan akan berlaku peningkatan kes harian pada bulan ini dan Februari tetapi selagi kemasukan ke hospital, unit rawatan rapi (ICU) berada dalam paras terkawal dan kadar kematian masih lagi menurun, kita masih lagi keadaan terkawal," katanya.

Katanya, keadaan di Selangor juga masih terkawal walaupun setiap hari merekodkan jumlah kes tertinggi.

"Antara sebab (kes tinggi di Selangor) adalah kemasukan pintu antarabangsa terletak di negeri itu mana (pengembara) berdaftar di negeri ini walaupun bukan orang Selangor," katanya.